

**Ni Presidente
Dieter F. Uchtdorf**

Maikadua a Mammagbaga iti
Umuna a Pangulu



Ti Kasayaatan a Panawen a Panagmula iti Kayo

Iti nagkauna a Roma, ni Janus ti dios dagiti pangrugian. Masansan a mailadawan isuna iti dua a rupa—maysa a kumitkita iti napalabas, ken maysa a kumitkita iti masakbayan. Sumagmamano a lengguahe ti nangnagan iti bulan ti Enero a maisurot kenkuana gapu ta ti pangrugian ti tawen ket panawen para iti panagutob kasta met iti panagplano.

Rinbribu a tawen kalpasanna, adu a kultura iti intero a lubong ti mangipatpatungpal iti maysa a tradision nga agaramid kadagiti resolusion para iti baro a tawen. Kinnaagpaysona, nalaka ti agaramid kadagiti resolusion—ti panangtungpal kadagito ket sabali a banag.

Maysa a lalaki a nagaramid iti atiddog a listaan dagiti resolusion ti Baro a Tawen ket nakarikna iti nasayaat maipapan iti panagprogresona. Napanunotna iti bagina, “No kaskasano, natungpalko ti panagkumitko a bassit ti kanek, diak nagpungtot, sinurotko ti badyetko, ken uray naminsan diak nagreklamo maipanggep iti aso ti kaarruba. Ngem ita nga aldaw ket Enero 2 ket nagunin ti alarma ket orasen tapno bumangonak iti iddak. Itultuloyko ti mangtun-oy iti amin a panggepko a tun-oyen.”

Panangirugi

Adda maysa a banag a di nakappapati a makatulong maipapan iti damo a panangirugi. Panagkunak iti maysa

a panawen wenno sabali pay kayattayo amin ti mangrugi manen nga awanan iti biddut.

Paggugustok ti gumatang iti baro a computer nga addaan iti nadalus a hard drive. Iti maysa a panawen nakamaymayat ti panagtrabahona. Ngem iti panaglabas dagiti aldaw ken lawas immadu nga immadu dagiti program a na-install (adda dagiti naigagara, adda met dagiti saan a naigagara), iti kamaudiananna mangrugi nga agpataypatay ti computer, dagiti banag a sigud nga ar-ramidenna iti napardas ken nasamay ket agbalindan a nabuntog. No dadduma saanen a mausar daytoy. Uray ti panangpa-start iti daytoy ket agbalinen a parikut ta masekkan ti hard drive kadagiti di kasapulan a data ken electronic debris. Adda dagiti gundaway a ti laeng kakaisuna a pamuspusan ket ireformat ti computer tapno mai-start daytoy.

Maipada met kadagiti tao a madagensen kadagiti buteng, duadua, ken pakadagsenan a basol. Dagiti biddut nga inaramidtayon (agpada a naigagara ken saan a naigagara) ket mangpadagsen kadaytoy agingga a kasla narigaten nga aramidentayo ti ammotayo a nasken koma nga aramidentayo.

Iti kaso ti basol, adda napintas a wagas ti panangreforma [reformat] a maawagan iti panagbabawi a mangpalugod kadaytoy a mangikkat kadagiti hard drive

ti dagensen iti kaunggantayo a mangpadagsen kadagiti puspusotayo. Ti ebanghelio, babaen ti namilagruan ken manangngaasi a Pannubbot ni Jesucristo, ket mangipakita kadatayo iti wagas a pakadalusan dagiti kararuatayo iti mulit ti basol ket agbalintayo manen a baro, natar-naw, ken kas iti maysa nga ubing nga inosente wenno awan basolna.

Ngem no dadduma pabuntogennatayo dagiti dadduma pay a banag ket pasardengendatayo, a mangigapu kadagiti saan a produktibo a panagpanunot ken panaggunay tapno mangaramid a narigat para kadatayo ti mangirugi.

Panangpaltuad iti Kasayaatan Kadatayo

Ti panangituding kadagiti panggep a tun-oyen ket napateg nga aramiden. Ammotayo nga addaan ti Nailangngitan nga Amatayo kadagiti panggep a tun-oyen gapu ta imbaganan kadatayo a ti aramid ken gloriana ket “mangipatungpal iti saan nga ipapatay ken agnanayon a biag ti tao” (Moises 1:39).

Dagiti bukodtayo a panggep a tun-oyen ket mangpaltuad iti kasayaatan kadatayo. Nupay kasta, maysa kadagiti banag a mangsinga kadagiti panagkagumaantayo iti panagaramid ken panagtungpal kadagiti resolusion ket ti panangitantan. No dadduma itantantayo ti mangrugi, nga ur-urayentayo ti umno a kanito a panangrugi—ti umuna nga aldaw ti baro a tawen, ti rugi ti kalgaw, no maawagantayo a kas bishop wenno presidente ti Relief Society, kalpasan a mangrugi nga ageskuela dagiti anaktayo, kalpasan ti panagretirotoy.

Saanyo a kasapulan ti maysa nga awis sakbay nga irugiyo ti panaggunayyo a mangaramid kadagiti nalinteg a panggepyo a tun-oyen. Saan a masapul nga urayenyo ti pammalubos tapno agbalinkayo a maysa a tao a nakaisangratanyo. Saan a masapul nga urayenyo a maawiskayo nga agserbi iti Simbaan.

No dadduma masayangtayo dagiti tawen ti panagbiagtayo iti panagur-uray a mapilitayo (kitaen iti DkK 121:34–36). Ngem palso dayta a panangipagarup. Napilikayon!

No dadduma iti biagko nabuboskon dagiti rabii nga awan turogko a maburiboran maipanggep kadagiti isyu, pakarikutan, wenno bukod a pagladingitan. Ngem kasano man ti kinasipnget ti rabii, kanayon a

maparegtanak daytoy a kapanunotan: iti bigat agsingisinto ti init.

Iti tunggal baro nga aldaw, umay ti baro a parbangon—saan laeng a para iti lubong no di ketdi para kadatayo amin. Ken iti maysa a baro nga aldaw umay ti baro a pangrugian—maysa a gundaway a mangrugi manen.

Ngem Ania No Mapaaytayo?

No dadduma ti banag a manglapped kadatayo ket buteng. Mabalina a mabutengtayo amangan no ditayo agballigi, amangan no agballigitayo, amangan no mapabainantayo, amangan no mapagbalbaliwnatayo ti balligi, wenno amangan no balbaliwan ti balligi dagiti tao nga ipatpategtayo.

Ket isu nga agur-uraytayo. Wenno sumukotayo.

Sabali pay a banag a masapul a laglagipentayo no maipanggep iti panangituding kadagiti panggep a tun-oyen ket daytoy: Dumani awan duadua a mapaaytayo—uray no kaskasano iti ababa nga agpang wenno short term. Ngem imbes a mapukawantayo iti namnama, ad-adda a mapabilegtayo gapu ta ikkaten daytoy a pannakaawat ti presion wenno pressure ti panagbalin a perpekto ita nga oras. Daytoy ti mangbigbig manipud iti rugi nga iti maysa a panawen wenno sabali, mapaaytayo a mangaramid kadagiti banag a ninamnama wenno nakiddaw kadatayo. Ti panangammotayo iti daytoy manipud iti rugi ket mangikkat iti adu a pakasdaawan ken pakaawanan namnama ti pannakapaay.

No rugiantayo dagiti panggeptayo a tun-oyen iti kastoy a wagas, saan a nasken a bedngannatayo ti panakapaay. Laglagipen, nga uray no mapaaytayo a mangragpat iti kangrunaan ken tinarigagayan a pagtungpalan ita nga oras, makaaramidtayto iti panagprogreso iti dalan a mangiturong kadatayo iti daytoy.

Ket napateg dayta—dakkal ti kaipapananna.

Nupay mapaaytayo a makadanon iti finish line, ti panangitululoytayo laeng iti panagdaliasat ket mangaramid kadatayo a nain-indaklan ngem iti sigud.

Itan ti Kasayaatan nga Oras a Mangirugi

Kuna ti daan a pagsasao, “Ti kasayaatan nga oras a panagmula iti kayo ket 20 a tawen ti napalabasen. Ti maikadua a kasayaatan nga oras ket itan.”

Adda maysa a banag a nakaskasdaaw ken manam-nama maipapan ti balikas nga *itan*. Adda maysa a banag a mangpabpabileg maipapan iti kinapudno a no pilientayo nga ikeddeng itan, mabalintayo ti agtignay nga agtultuloy iti daytoy mismo a kanito.

Itan ti kasayaatan nga oras a panangrugi iti panag-balintayo a tao a kayattayo a pagbalinan iti kamaudian—saan laeng a kalpasan ti 20 a tawen no di ketdi pay para iti amin a kinaagnanayon.

PANANGISURO MANIPUD ITI DAYTOY A MENSAHE

Inlawlawag ni Presidente Uchtdorf a no mapaaytayo a mangragpat kadagiti panggeptayo a tun-oyen, “m-pabilgantayo. . . . Nupay mapaaytayo a makadanon iti finish line, ti panangitultuloytayo laeng iti panagdaliasat ket mangaramid kadatayo a nain-indaklan ngem iti sigud.” Kiddawenyo kadagiti miembro ti pamilia a mangisalaysay kadagiti padas a nakasursuruanda iti ad-adu pay manipud iti proseso ngem iti nasursuroda manipud

iti nagbanagan, kas koma iti panagturpos manipud iti pagadalan wenno panangawat iti maysa a gunggona.

AGTUTUBO

Agbalinka a Kasayaatan Mismo— Manipud Ita

|sursuro ni Presidente Uchtdorf a “dagiti bukod a panggep a tun-oyen ket makapaltuad iti kasayaatan kadatayo.” Panunotem ti mangituding iti sumagma-mano a panggep a tun-oyen iti dua wenno tallo a tay-ak ti biagmo, kas iti salun-at ti bagi, salun-at ti es-piritu, ken dagiti pannakigayyem, kas pagarigan. Ania dagiti balligi a kayatmo a gun-oden kadagitoy a tay-ak itoy a tawen? Bayat ti sikakararag a panangpanunotmo iti sumagmamano a panggep a tun-oyen, penkem a maragpatda ngem agkasapulanto iti panagdurasmo. Iti journalmo, ilawlawagmo iti detalye dagiti panggepmo a tun-oyen tapno makitamto ti panagprogresom kalpa-san ti makatawen.



Pammati • Pamilia • Tulong

Ti Nadiosan a Mision ni Jesucristo: Pagwadan

Nainkararagan nga adalenyoy daytoy a material ken kalikagumanyo nga ammuen no ania ti ibinglay. Kasano a ti pannakaawatyo iti biag ken mision ti Mangisalakan ket mangpapigsa iti pammatiyo Kenkuana ken mangbendision kadagiti ay-aywananyo babaen ti visiting teaching? Para iti ad-adu pay nga impormasion, mapan iti reliefsociety.lds.org.

Daytoy ti paset ti maysa a serye dagiti Mensahe iti Visiting Teaching a mangitampok kadagiti aspekto ti mision ti Mangisalakan.

No maawatantayo a ni Jesucristo ti pagwadantayo iti amin a banag, manayonantayo ti tarigagaytayo a sumurot Kenkuana. Dagiti nasantuan a kasuratan ket napnuan iti pammaregta para kadatayo tapno surotentayo dagiti tugot ni Cristo. Kadagiti Nephite, kinuna ni Cristo, “Agsipud ta dagiti aramid a naimatanyon nga inaramidko ti aramidenyonto met” (3 Nephi 27:21). Ken ni Tomas, kinuna ni Jesus, “Siak ti dalan, ti kinapudno, ken ti biag: awan ti umay iti Ama, no di magna kaniak” (Juan 14:6).

Iti agdama palagipandatayo dagiti lidertayo a ti Mangisalakan ti aramidentayo a pagwadantayo. Kinuna ni Linda K. Burton, sapaap a presidente ti Relief Society, “No addaan ti tunggal maysa kadatayo iti doktrina ti Pannubbot a naisurat iti uneg dagiti puspustayo, kalpasanna mai-rugitayonton ti agbalin a kita ti tao a kayat ti Apo a pagbalinantayo.”¹

Kinuna ni Presidente Thomas S. Monson, “Ti Apo ken

Mangisalakantayo, ni Jesucristo, ti Pagwadantayo ken pigsatayo.”²

Ikeddengtayo ti umasideg ken ni Jesucristo, agtungpal kadagiti bilinna, ken ikarigatan a makasubli-tayo iti Nailangitan nga Amatayo.

Manipud kadagiti Nasantuan a Kasuratan

2 Nephi 31:16; Alma 17:11;
3 Nephi 27:27; Moroni 7:48

Manipud iti Pakasaritaantayo

“Minarkaanna ti dana ken inturongna ti dalan,” insurat ni Eliza R. Snow, maikadua a sapaap a presidente ti Relief Society, maipapan iti panagserbi iti daga [mortal ministry] ni Jesucristo.³ Pinagserbianna dagiti tao—a saggaysa. Insurona a nasken a panawantayo ti siam-a-pulo-ket-siam tapno isalakantayo ti maysa a nayaw-awan wenna napukaw (kitaen iti Lucas 15:3–7). Inagasan ken sinuruanna dagiti tao, naaddaan pay iti panawen para iti tunggal tao iti umariwekwek a 2,500 a tattao (kitaen iti 3 Nephi 11:13–15; 17:25).

Kadagiti babbai a Santo iti Ud-udina nga Aldaw, kinuna ni

President Dieter F. Uchtdorf, Maikadua a Mammagbaga iti Umuna a Pangulu: “Dakayo a nasasayaat a kakabsat a babbai ket mangipapaay iti serbisio iti panangngaasi kadagiti dadduma para iti dakdakkal a gapu ngem iti tarigagayyo para kadagiti bukod a pagimbagan. Iti daytoy matuladyo ti Mangisalakan. . . . Kanayon a pampanunotenna maipapan ti no kasano a matulonganna dagiti dadduma pay.”⁴

DAGITI NAGADAWAN

1. Linda K. Burton, “Is Faith in the Atonement of Jesus Christ Written in Our Hearts?” *Ensign* wenna *Liahona*, Nob. 2012, 114.
2. Thomas S. Monson, “Meeting Life’s Challenges,” *Ensign*, Nob. 1993, 71.
3. “How Great the Wisdom and the Love,” *Hymns*, no. 195.
4. Dieter F. Uchtdorf, “Happiness, Your Heritage,” *Ensign* wenna *Liahona*, Nob. 2008, 120.

Ania ti Maaramidko?

1. Apay ken kasano a pagwadak ni Jesucristo?
2. Kasano a ti panagserbik kadagiti kakabsat a babbai ket makatulong kaniak a sumurot iti Mangisalakan?